

प्रमुख समाचार –

- मुख्यमंत्री कन्या विवाह योजना के तहत आज प्रदेश म तेईस सौ ले जादा जोड़ा मनके होइस बिहाव ।
- देसभर के संग छत्तीसगढ़ म काली नौ मई के राष्ट्रीय लोक अदालत के आयोजन- ए दउरान कोर्ट म लंबित मामला मनके होही निपटारा ।
- प्रदेश म काली एक-दू जघा गरज-चमक के संग हवा गरेर अउ गाज गिरे के चेतावनी ।

मुख्यमंत्री कन्या विवाह योजना

मुख्यमंत्री कन्या विवाह योजना के तहत आज प्रदेश के सबो जिला म सामूहिक विवाह के आयोजन करे गिस। ए प्रदेशव्यापी आयोजन म दू हजार तीन सौ ले जादा जोड़ा मन के अपन-अपन धरम अउ रीति-रिवाज ले बिहाव होइस। एमा हिन्दू, मुस्लिम, ईसाई, बौध्द अउ बिसेस पिछड़ा जनजाति के जोड़ा घलो समिल रिहीन।

उहें, मुख्यमंत्री कन्या विवाह योजना के तहत सक्ती जिला म 70 अउ गौरेला-पेंड्रा-मरवाही जिला म 72 जोड़ा के बिहाव कराय गिस। बतादन कि गौरेला-पेंड्रा-मरवाही जिला के कारीकरम म बिसेस रूप ले चार बड़गा आदिवासी परिवार के दू जोड़ा आकर्षण के केंद्र रिहीस। महिला अउ बाल विकास विभाग के अधिकारी अमित सिन्हा ह बतइन कि विभाग ह बेटी बचाओ-बेटी पढ़ाओ अभियान ल बढ़ावा देय के संग जिला ल बाल विवाह मुक्त बनाय के दिसा म सरलग कारज करत हे।

आकाशवाणी-मैराथन

आकाशवाणी ह राष्ट्र के प्रति अपन बिसेस सेवा के नब्बे बछर पूरे के मउका म आज राष्ट्रीय राजधानी म मैराथन के आयोजन करिस। करीबन साढ़े तीन किलोमीटर मैराथन के सुरुआत आकाशवाणी भवन ले होइस। ए मैराथन कृषि भवन, रेल भवन, रिजर्व बैंक ऑफ इंडिया ले गुजरत आकाशवाणी भवन म सिराइस। मैराथन पूरा करइया सबो प्रतिभागी मन ल पदक प्रदान करे गिस। उहें, पुरुष अउ महिला दूनो वर्ग म उपर के तीन प्रतिभागी मन ल ट्रॉफी प्रदान करे गिस। बतादन कि प्रसार भारती के मुख्य कार्यकारी अधिकारी गौरव द्विवेदी अउ आकाशवाणी के महानिदेशक राजीव कुमार जैन ह ए मैराथन ल रवाना करिन। ए मउका म आकाशवाणी के महानिदेशक राजीव कुमार जैन ह बतइन कि ए आयोजन सार्वजनिक प्रसारक के रूप म आकाशवाणी के देस के सेवा म करे गे योगदान ल दर्साथे।

राष्ट्रीय लोक अदालत

देसभर के संग छत्तीसगढ़ म काली नौ मई के राष्ट्रीय लोक अदालत के आयोजन होही। ए दउरान कोर्ट म लंबित मामला मनके आपसी सहमति ले निपटारा करे जाही। उहें, इक्कीस ले तेईस अगस्त के बीच सर्वोच्च न्यायालय परिसर म बिसेस लोक अदालत म घलो लंबित मामला मनके सुनवाई होही। पक्षकार मन ल अपन लंबित मामला ल बिसेस लोक अदालत म सामिल करे बर जानकारी सर्वोच्च न्यायालय के वेबसाइट म इक्कीस मई तक गूगल फॉर्म म देना होही। जादा जानकारी बर बार रूम के वन स्टाफ सेंटर या जिला विधिक सेवा प्राधिकरण रइपुर ले संपर्क करे जा सकत हे।

कर्मचारी-महंगाई भत्ता

छत्तीसगढ़ स्टेट पावर ट्रांसमिशन कंपनी लिमिटेड ह अपन अधिकारी-करमचारी मनके महंगाई भत्ता म केंद्र सरकार जइसन दू प्रतिसत बढ़ोत्तरी के ऐलान करे हे। मुख्य अभियंता के आदेस ले अब करमचारी मन ल साठ प्रतिसत डीए दे जाही। ए बढ़ोत्तरी एक जनवरी दू हजार छब्बीस ले प्रभावी माने जाही। उहें, मई के वेतन ले करमचारी मन ल नवा दर ले भुगतान करे जाही।

धान खरीदी-गड़बड़ी

जांजगीर-चांपा जिला म धान खरीदी म बड़े गड़बड़ी उजागर होय हे। जिला के तीन टन धान खरीदी केंद्र कीरित, कड़ारी अउ बिरा म करीबन चार हजार सात सौ कुंटल धान गबन करे गिस, जेखर कीमत एक करोड़ उनतीस लाख रुपिया बताय जावत हे। मामला आगु आय के बाद नवागढ़, बिरा अउ बारद्वार थाना म सात इन करमचारी के खिलाफ केस दर्ज करे गिस। एमा संस्था प्रबंधक, खरीदी प्रभारी, ऑपरेटर अउ हमाल घलो सामिल हैं। ए सबो आरोपी मामला आगु आय के बाद फरार बताय जावत हे।

शिक्षक-कार्रवाई

छत्तीसगढ़ शिक्षा माध्यमिक मंडल ह हायर सेकेंडरी स्कूल परीक्षा-2025 के उत्तर पुस्तिका मूल्यांकन म लापरवाही बरतइया तीस इन शिक्षक मनके बड़े कारवाही करे हे। मंडल के आदेस म एखर ले जुड़े शिक्षक मन ल अवइया तीन बछर बर आने-आने कारज ले ब्लैकलिस्ट कर देय गिस। जानकारी ले, उत्तर पुस्तिका के पुनर्मूल्यांकन के बेरा कतकोन छात्र मनके अंक ल बीस ले चालीस तक के बढ़ाय गे रिहीस हे, जेला गंभीर लापरवाही मानत मंडल ह जांच के बाद शिक्षक मन उपर कारवाही करिस। मंडल ह लापरवाह शिक्षक मन के एक वेतनवृद्धि संचयी प्रभावी ले रोके के घलो अनुसंसा करे हे।

दुर्घटना

कोरबा जिला के बांगो थाना इलाका म चोटिया गांव के तिर राष्ट्रीय राजमार्ग-130 म सड़क हादसा होगो, जेमा एस.ई.सी.एल. गोवरा के पूर्व महाप्रबंधक अरुण कुमार त्यागी के निधन हो गिस। जानकारी ले अरुण कुमार त्यागी के हाल ही म डायरेक्टर टेक्निकल के पद म पदोन्नति होय रिहीस हे। ओमन इही नवा जिम्मेदारी ल संभाले बर कार ले सिंगरौली जावत रिहीन हैं। इही बेरा चोटिया गांव के तिर उंखर कार एक टन आने गाड़ी ले टकरा गिस।

उहें, जांजगीर-चांपा जिला के बलौदा इलाका म घलो हरदीबाजार रद्दा म कोयला भरे टरक पलटगे। एखर चपेट म आय ले फटफटी सवार दू इन के मउका म ही मउत होगे। ए घटना के बाद टरक चलइया मउका ले फरार बताय जावत हे।

ओति, सक्ती जिला के नंदिनी गांव म बस स्टैंड के तिर दू टन गाड़ी टकरा गिन। हादसा म कार सवार एक मनखे के मउत होगिस। ए हादसा म आमाकोनी गांव के सरपंच के संग चार लोगन घायल होगिन।

अवैध पेड़ कटाई-जांच

धमतरी-जगदलपुर राष्ट्रीय राजमार्ग क्रमांक-तीस के चौड़ीकरण कारज म बड़का लापरवाही आगु आय हे। वन विभाग के सुरुआती जांच म पता चले हे कि स्वीकृत एलाइनमेंट ले बाहिर जाके **आठ हजार** ले जादा पेड़ ल काटे गिस। मामला के गंभीरता ले लेवत विभाग ह दोषी मनके खिलाफ कड़ा कारवाही के प्रक्रिया सुरु कर देहे।

बछर दू हजार सत्रह म ए परियोजना बर बालोद, कांकेर, कौंडागांव अउ बस्तर जिला के चार सौ दू हेक्टेयर ले जादा वन भूमि के उपयोग के अनुमति देय गे रिहीस। केसकाल वनमंडल म **दस हजार सात सौ इकतीस** पेड़ के काटे के मंजूरी मिले रिहीस, जेमा जांच समिति ह पाइस कि **आठ हजार** ले जादा पेड़ स्वीकृत क्षेत्र ले बाहिर काटे गिस। वन विभाग ह जिम्मेदार तत्कालीन अधिकारी-कर्मचारी मनके खिलाफ कारवाही के प्रस्ताव वरिष्ठ कार्यालय ल भेज दे गेहे।

जशपुर-पुल स्वीकृत

जशपुर जिला म कुनकुरी-तपकरा-लवाकेरा रद्दा के श्री नदी म बड़का पुलिया अउ पहुंच मार्ग निर्माण बर राज्य सरकार ह करीबन **नौ करोड़ पैंतालीस लाख रुपिया** के स्वीकृति देय हे। ए पुलिया छत्तीसगढ़, झारखंड अउ ओडिशा ल जोड़इया रद्दा म बनाय जाही। पुलिया बने ले तीन राज्य के बीच अवई-जवई जादा सुरक्षित अउ सरल होही। हाल बेरा संकरा पुलिया होय के सेति बरसात के दिन म परेसानी होवत रिहीस, एखर सेति लंबा बेरा ले क्षेत्रवासी मन पुलिया के मांग करत रिहीन।

वनोपज संरक्षण वाणी

वन मंत्री केदार कश्यप ह आज नवा रइपुर म 'छत्तीसगढ़ वनोपज संरक्षण वाणी' अउ आई.वी.आर.एस. आधारित सूचना अउ संवाद तंत्र के सुभारंभ करिन। संग्राहक मन ल जानकारी लेय बर टोल फ्री नंबर— **नौ आठ एक—एक—एक दू पांच आठ एक तीन (9811125813)** म मिस्ड काल करना होही। मिस काल के बाद **नौ—एक—एक (911)** ले सुरु होवइया नंबर ले उपयोगकर्ता ल काल बैक आही। फोन उठावत ही संग्राहक अपन स्थानीय बोली—हल्बी अउ गोंडी म घलो जानकारी सुन सकहीं।

मौसम

प्रदेस म काली एक—दू जघा गरज—चमक के संग हवा गरेर अउ गाज गिरे के चेतावनी देय गेहे। मौसम विभाग के अनुसार एक ठन द्रोणिका दक्षिण—पश्चिम उत्तर प्रदेस ले अंदरूनी ओडिसा अउ छत्तीसगढ़ होवत गुजरही। एखर प्रभाव ले प्रदेस म काली कुछेक जघा गरज—चमक के संग छीटा पड़े के संभावना हे।

गांजा—बरामद

महासमुंद पुलिस, एंटी नारकोटिक टास्क फोर्स अउ कोमाखान पुलिस ह संयुक्त रूप ले कारवाही करत एक ठन एबुलेंस ले पचहत्तर किलो गांजा जब्त करे गिस। आरोपी मन ओडिसा ले गांजा लेके महाराष्ट्र ले जावत रिहीन। ए मामला म महाराष्ट्र के पांच इन तस्कर मन ल गिरफ्तार करे गेहे अउ उंखर तिर ले गाड़ी अउ पांच ठन मोबाइल जब्त करे गिस।

श्रमिक—स्वास्थ्य शिविर

कर्मचारी राज्य बीमा निगम डहार ले काली राजधानी रइपुर के **ई.एस.आई.सी.** अस्पताल रावाभाठा म निसुल्क जांच शिविर के आयोजन करे गिस, जिहां चालीस बछर ले जादा उमर के बीमा होय अब्बड़ इन श्रमिक मन स्वास्थ्य जांच कराइन।

